


**PNG LNG Kwatali
Envairomen na Sosel Ripot**

Namba Tri Kwata

2013



PNG LNG

*Energy for the World. Opportunity for Papua New Guinea.
Eneji Bilong Wol. Luksave Bilong Papua Niugini.*



PROJEK I STAP LONG MAK BILONG BASET NA TAIM

“Strongim tingting long sefti na kamapim wok, i mekim na PNG LNG Projek i stap long mak bilong baset na taim long salim namba wan Likwifait Neturel Ges i go aut long 2014.”

- Decie Autin, Projek Eksekutiv, Esso Highlands Limited



Papua Niugini Likwifait Neturel Ges (PNG LNG) Projek (Projek) i bin winim wanpela bikpela mak long Septemba taim ol i putim neturel ges long Kutubu Sentral Prosesing Fasiliti namba wan taim tru, i go kamap long LNG Plent. Em i makim tu wok i kamap nau long onso na opso paipain na LNG Plent sait.

Ol wok long Projek em 90 pesen i pinis nau na i bihainim taim ol i makim long salim namba wan LNG long namba tu hap bilong 2014. Toksave long 2012, estimet kost bilong Projek i stap yet long mak bilong US\$19 bilien, em i piksa bilong pasim tingting na strongim wok bilong projek manesmen long wanpela ples we i gat planti salens i kamap long ol wok.

Dispela namba fiftin PNG LNG Kwatali Enviromen na Sosel Ripot we mipela i toksave long wanem ol wok i kamap long konstraksen, sefti, helt, sekiuriti, sosel na enviromen eria bilong Projek. Esso Highlands Limited, wanpela han bilong Exxon Mobil Corporation, i go pas long Projek long mekim wok bilong konstraksen na operesen na i developim dispela Projek wantaim ol ko-vensera olsem:

Oil Search Limited, National Petroleum Company of PNG (Kroton) Limited, Santos Limited, JX Nippon Oil and Gas Exploration Corporation, Mineral Resources Development Company Limited na Petromin PNG Holdings Limited, wantaim ol wanwok bilong ol.

Konstraksen

Mipela i winim tupela bikpela mak long ol konstraksen wok long namba tri kwata. Namba wan samting i bin kamap long mun Ogas long taim las 88 Antonov balus i karim ol hevi ikwipmen i kam daun long Komo Ples Balus. Namba tu samting em taim ol i putim neturel ges long Kutubu Sentral Prosesing Fasiliti i kam kamap long LNG Plent.

Moa long 90 pesen wok i pinis long PNG LNG Projek

Ki konstraksen i stap long Tebol 1.

Tebol 1 – Ol kontrak na bikpela wok konstraksen

Kontrak	Kontrakta	Ol bikpela wok long namba tri kwata 2013
LNG Plent na Marin Fasilitis (EPC3)	Chiyoda and JGC Joint Venture	Komisin ges i kamap long LNG Plent. Laitim fle o paia, long namba wan taim na statim tripela yutilitis jenereta. Ol i swisim on pemenen lait bilong komon proses eria, yutilitis eria na LNG jeti.
Hides Ges Kondisening Plent na Hides Welpeds (EPC4)	CBI and Clough Joint Venture	Pinsim wok bilong karim ol hevi ikwipmen long Komo Ples Balus i go long Hides Ges Kondisening Plent. Putim simen na putim paip spul long Welped B.
Onso Paipain (EPC5A)	SpieCapag	Komisin ges i go insait long paipain. Pinsim wok bilong weldim 362 kilomita paipain, haidrotestim 286 kilomita bilong lain, na reinstetmen o mekim ol wok bilong stretim bek Right of Way, i kamap long mak bilong 221 kilomita.
Komo Ples Balus (EPC5B)	McConnell Dowell and Consolidated Contractor Group Joint Venture	Antonov balus i mekim las ran long lusim ol hevi ikwipmen. Reinstetmen o stretim bek 57 hekta graun. Reinstetmen o stretim bek ples insait long perimita banis.
Asosietet Ges Developmen	Kain kain	Pinsim wok bilong ges na kondenset mita fasiliti long Kutubu Sentral Prosesing Fasiliti na givim i go long Prodaksen ogenaisesen.
Driling	Nabors Drilling International Limited	Driling Rig 702 i pinsim wok bilong dril long Welped B na muv i go long stat wok long Welped D.
Pemanen Fasilitis Kompaun	Leighton (PNG) Limited	Mekim yet ol wok bilong stretim graun na faundesen bilong administretiv bilding.



Tim bilong Sistems Komplisin na Operesens i statim tripela bilong ol sevenpela jenereta long LNG Plent yutilitis eria

Wok bilong envairomen

Long taim ol wok long planti hap bilong Projek i wok long pinis, wok i kamap nau long stretim bek na putim ol pemanen banis na arapela samting long stretim bek ples. Wanpela eksampel, long LNG Plent sait, ol i wokim ol samting bilong kontrolim graun i bruk na stopim graun i pulapim wara long taim wok i kamap long stretim bek ples. Bai i gat wok i kamap oltaim long sekap long ol dispela samting long taim bilong prodaksen.

Long wan wan kwata, wok i kamap long foapela eria insait long LNG Plent sait long testim kwaliti bilong win. Olgeta dispela eria i soim olsem mak i stap daunbilo long mak Projek inap long rausim. Long taim komisin bilong ges i stat long Septemba, moa wok i kamap gen long testim win long taim paia bilong kukim ges i lait long sekap long hamas salfa daioksait na naitrojen daioksait i kamaut. Risal bilong olgeta i soim olsem mak i stap daunbilo long mak World Health Organization i putim long ol emisen. I bin gat ol test i kamap tu long sekap long nois long taim bilong komisin, tasol olgeta risal i soim olsem mak i stap daunbilo long mak Projek Envairomen Permit i putim.

Ol wok bilong Projek long lukautim ol enimal bilong bus na wara na ol diwai (Baiodaivesiti) Strateji i wok long kamap, wok i kamap hariap tru long baiodaivesiti ofset program, em i stap insait long Baiodaivesiti Ofset Deliveri Plen. Long dispela kwata, ol i skruim moa wok long program bilong baiodaivesiti ol i kolim Enhansing Konsevesen Kepesiti long taim University of Papua New Guinea i kisim moa leksera na sapot wok lain.

Dispela Enhansing Konsevesen Kepesiti program i kamap bihain long agrimen namel long Projek na Mama Graun Conservation Trust Fund long Epril 2013. I gat tripela ki hap bilong en: konsevesen manesmen kos, ol skolasip, na painim wokples bilong ol woka. Long Septemba, University of Papua New Guinea i tokaut olsem bai em i givim Diploma in Conservation Management kos olsem hap bilong dispela program.

Hides Weist Manesmen Fasiliti i wok long kisim moa pipia i kam long ol wok ples bilong Projek.

Long taim sampela bilong ol i redi nau long pinisim wok, ol i stat long karim ol weist o pipia ol i bin bungim i stap i go long Hides Fasiliti long rausim. Wanpela eksampel, Hides Weist Manesmen Fasiliti i save kisim moa long 50 ton pipia. Moa long 20 ton em ol sit bilong paia i kam long Komo Ples Balus, na 15 kontena i gat kain kain pipia i kam long kontrakta bilong Onso Paiplain.

Ol pipia timba na metal long Hides Ges Kondisening Plent (HGCP) sait em ol lain bilong ples i save yusim wantaim helpim i kam long Juni Konstraksen Trening Fesiliti, long wokim ol skul, ol desk, tebol na sia. Ol komyuniti grup tu i yusim ol dispela samting long stretim ol haus, sios na ol arapela samting bilong komyuniti.

Long Komo Ples Balus, wok bilong stretim bek ples i winim mak bilong 57 hekta long dispela kwata, dispela i karamapim tu eria i stap not long hap we balus i save ran i go long en. Ol wok bilong stretim bek ples i kamap tu insait long banis na long ap bilong Tamalia Riva Baro Pit, we ol i planim samting olsem 14,200 diwai.



Komo Ples Balus i soim eria we ol i stretim bek ples long tupela sait bilong ranwe

Wantaim ol arapela weist manesmen inisitiv, kontrakta bilong Komo Ples Balus i wok long yusim gen ol olupela taia i kam long ol wok bilong onso paiplain long stretim bek graun na ol arapela wok. Long dispela kwata, ol i stretim ol olupela taia bilong trak na yusim gen long wok bilong stretim bek ples.

Sefti, helt na sekiuriti

Sori tru, i bin gat wanpela indai i kamap long Projek long dispela kwata. Wanpela kontrakta i mekim wok long lainim tupela seksen bilong paip long onso paiplain na wanpela seksen i muv na em i kisim bikpela bagarap na em i dai. Projek i sori tru long dispela birua i kamap na i salim bikpela tok sori i go long famili na ol poroman bilong dispela woka.

Ripot i go hariap tru long ol atoriti na i gat wanpela wokpainimaut i bin kamap long dispela birua. Bihain long dispela, ol i putim was na stretim ol samting dispela wokpainimaut i bin kamapim.

Ol i givim toksave bilong ol samting dispela wokpainimaut i bin kamapim long olgeta ples bilong wok long stopim wankain birua olsem i kamap gen.

Projek i strongim wok long rot bilong daunim ol birua i kamap na stopim ol bikpela hevi long kamap. Long ol kwata ripot mipela glasim long ol bikpela hevi inap kamap, mipela i luksave long wanem eria mipela i mas strongim gut wok. Ol wok bilong stretim gut wok, na moa toksave long ol woka long sefti, i lukim olsem mak bilong ol bikpela hevi inap kamap, i surik i kam daun bihain long namba wan kwata 2012.

Long taim komisin ges i kamap long LNG Plent sait long dispela kwata, em i kamapim tu ol nupela sefti fokas bikos sampela hap bilong dispela fasiliti em i gat haidrokabon o ges i stap long en nau. Bipo long dispela komisin ges i bin kamap, samting olsem 8,000 LNG Plent sait konstraksen woka i bin stap insait long imejensi dril long kisim save long wanem kain imejensi inap kamap long ol ges na arapela haidrokabon. Dispela dril i bin kamap gut na ol woka i ken karim save ol i kisim long en i go bek na bihainim long taim bilong komisin na prodaksen. Bipo long ol woka i ken kisim tokorait long go insait long eria we i gat ol haidrokabon long en, ol Projek woka i mas kisim trening long Prodaksen Wok Manesmen Sistem bilong Esso Highlands Limited pastaim. Na bihain long en bai i orait long ol i mekim wok konstraksen long taim ol i wok long ples we i gat ol haidrokabon long en.



Ol woka i bung long taim bilong imejensi dril long LNG Plent sait

Dispela Sefti Sempian inisitiv i go het yet long dispela kwata, we 88 woka i pinisim trening. Long taim dispela inisitiv i stat long 2011 i kam inap nau, dispela Sefti Sempian inisitiv i kamap gut na ol woka na kontrakta wantaim i laikim. Long pinis bilong dispela kwata, moa long 1,400 woka i bin pinisim trening.

Long dispela kwata, ol i bin putim sefti bilong ol lain i wokabaut long rot na ol trefik i go pas, bikos long ol bikpela trak i karim ol samting long Komo Ples Balus i go long HGCP sait. Olgeta kago i bin kamap gut bikos long wok Projek tim, kontrakta na ol lokal trefik kontrola i mekim long givim bikpela sevis long wok wantaim ol lokal komyuniti na Projek trefik.

Sekiuriti tim tu i wok long givim gutpela wok namel long Projek na komyuniti. Long redi long ol wok bilong prodaksen, dispela tim i go pas long lukautim bikpela trening na stia progrem bilong ol Papua Niugini sekiuriti lain long fil na i mekim ol edministretiv sapot wok. Long Ogas, ol i givim tupela Papua Niugini posisen em tupela ovasis wokman i bin holim, na i givim moa sans long ol Papua Niugini wokman i strongim save bilong ol long sekiuriti manesmen.

Helt tim i glasim na i redi nau long givim olgeta wok bilong helt i go long Prodaksen tim long taim ol i redi long prodaksen wok i kamap. Hap bilong dispela woki redi, ol i givim sapot long pinisim olgeta wok na ol nupela wok bai kamap long ol wok ples olsem long Komo Ples Balus.

Kamapim rot bilong gutpela helt kea long ol Papua Niugini komyuniti, em i narapela bikpela wok bilong Projek. Long dispela kwata, Projek i wok wantaim Papua New Guinea Tribal Foundation, MediSend International na Maersk Line long givim moa long 130 medikel ikwipmen i go long ol haus sik long Projek eria. Ol dispela ikwipmen na saplai i gat ol masin bilong sekap long lewa, masin bilong traim statim gen lewa, ol frisa, ilektrik haus sik bet, spesel bet bilong ol nupela bebi, intravenes pam, lait bilong sekap long sikman, maikroskop, nebulaisa, spesel bokis bilong glasim x-ray na masin bilong soim piksa bilong bebi insait long bel bilong mama.

Sosel developmen

Projek i wok long helpim yet wok bilong edukesen insait long Papua Niugini, na ol i givimaut 80 Toea mani manesmen pilai i go long ol skul i stap klostu long LNG Plent sait long dispela kwata. Dispela pilai, i bilong tupela i go inap eitpela pilaia na i bilong skulim ol studen long pasin bilong tingting gut long yusim mani long laip bilong ol, na luksave long wanem samting i ken kamap sapos ol i spendim mani na i no sevim long bihaintaim. Toea mani manesmen pilai em i wanpela eksampel bilong planti progrem Projek i go pas long en long sapotim ol skul long Papua Niugini.

Ol arapela progrem em long ExxonMobil Science Ambassadors Program, we i helpim ol haikul studen long kisim save long saiens na petrokemikel indastri long taim ol i glasim ol kain kain mineral na kemikal, na tu ol enimal o diwai i bin dai planti milien yia i go pinis. Projek i givim tu bikpela sapot long wokim ol haus bilong skul, wanpela eksampel, putim 1.3 milen Kina (US\$540,800) long bikpela wok bilong developim faipela praimer skul long Projek eria.

Wantaim ol dispela progrem bilong en yet, Projek i wok tu wantaim ol komyuniti-bes ogenaiesen long givim moa sans long edukesen bilong ol skul studen. Wanpela eksampel, Projek i givim sapot long lukluk raun bilong ol skul i go long Port Moresby Nature Park. Dispela progrem i bringim ol studen long ol skul long Nesenel Kepital Distrik na Sentral Provins i go insait long Park long lukim envairomen saiens na lukim ol samting bilong bus na ol enimal bilong Papua Niugini long wanpela hap tasol. I kam inap nau, 4,000 studen i bin stap insait long dispela lukluk raun progrem.



Ol studen i traim wokabaut olsem grasop long taim ol i go lukluk raun long Port Moresby Nature Park

Ol kontrakta tu i mekim wok bilong helpim ol skul. Wanpela eksampel, wanpela driling kontrakta i givim kompyuta trening long ol haikul tisa long Hela, na i givim ol fisiks, kemistri na baioloji teksbuk long ol studen. Narapela kontrakta i givim 20 bokis buk bilong prektis long rit long tok Inglis i go long faipela elementeri na praimer skul long Apstrim eria long dispela kwata.

Ol las projek long foapela bikpela ples long LNG Plent sait i bin pinis long dispela kwata, long taim ol pinisim wok bilong sanapim nupela bris bilong wokabaut long ples Papa. Olpela bris ol i bin wokim long mangro, i bin bruk tenpela yia i go pinis. Ol lain bilong Papa komyuniti i givim fri sevis, na wok wantaim Projek long sanapim dispela nupela bris, i gat 150-mita timba i stap antap long dispela bris i kalapim graun malumalu na wara. Dispela nupela bris bai helpim ol pipel bilong ples Papa long raun i go long ol liklik hanwara i stap insait, ples bilong painim pis, na hap bilong panim abus na wokim gaden na painim paiawut. Ol pipel i no inap lusim tu aua samting long go i kam long mekim ol dispela wok.

Long 2010, Projek i bin givim 115 dram aven na givim liklik trening kos long 26 Apstrim ples we i gat 60 grup bilong ol meri i mekim wok bilong ol. Astingting bilong dispela kos em long givim skul long ol komyuniti long kamapim ol liklik bisnis bilong kukim na salim kaikai na ol liklik samting olsem bret, skon, rost kakaruk. Ol i kisim skul tu long pasin bilong lukautim gut helt na stap klin na save long rot ol kaikai i save helpim bodi. Dispela trening program i kamap gut na nau i gat kos bilong givim trening i go gen long ol trena. Greduesen seremoni bilong tupela kos i bin kamap long Ogas we 656 lain i bin pinisim kos na kisim setifiket.

Long lukim olsem i mas gat saplai bilong kaikai oltaim long haus bilong ol lain husat i muv i go stap nau long narapela hap, Projek i wok wantaim moa long 30 model fama long hariap long kamapim planti moa rop kaukau. Projek i baim bek ol dispela rop kaukau na skelim i go long ol dispela haus. Ol fama i kisim teknikel helpim tu long groim ol kain kaikai olsem karot na kabis. Long dispela kwata, ol lain husat i muv i go sindaun klostu long Komo Ples Balus, HGCP, paipain Right of Way (ROW) na rot i go long ol welped, i toksave olsem Laivilhud Restoresen Program em i wanpela bikpela samting i mekim ol i sapotim wok bilong Projek.



Pemen Pani, lida bilong Yakamondo Wimens Grup i greduet long kos bilong givim trening i go long ol trena

Projek i go het yet long promotim sans bilong helpim ol meri Papua Niugini. Long dispela kwata, sevenpela meri long Sentral, Sauten Hailans, Hela na Galp provins i go stap insait long Global Women in Management alumni program long Wasington DC, wantaim sapot bilong Projek. Dispela program em i hap bilong ExxonMobil Women's Economic Opportunity Initiative, i traim long givim trening na stia toktok long ol meri long ol kain kantri i develop yet olsem Papua Niugini. Ol Papua Niugini meri husat i bin go stap long kos i no longtaim i go pinis, em ol lain husat i bin greduet long Global Women in Management bipo, na nau ol i gat save na inap kamapim ol gutpela sosel na ikonmik wok long komyuniti bilong ol.

Workforce development

Long pinis bilong kwata, total namba bilong wokmanmeri i stap long mak bilong 18,500, we i bin gat 19,300 woka long namba tu kwata 2013. Namel long ol dispela woka, 38 pesen em ol Papua Niugini sitisen. Namba bilong ol woka i surik i kam daun nau bikos wok i pinis long sampela hap.

18,500+ pipel i kamapim namba bilong Projek wokmanmeri

Wok bilong givim trening i lusim ol konstraksen-bes kos i go long ol dispela we bai helpim ol Papua Niugini long strongim save bilong ol long painim wok outsait long Projek. Wanpela eksampel, ol draiva bilong LNG Plent na Marin Fasilitis kontrakta i gat sans long kisim tripela mun trening kos long kompyuta long helpim ol i kisim save long mekim narapela wok tu.

Ol kontrakta i wok long strongim yet sefti trening long bungim rikwaimen bilong Projek. Long dispela kwata, moa long 1,000 wokmanmeri i statim Working at Heights trening na 150 woka i bin stap insait long Sefti Lidasip na Supavaisa Insiden Privensin program.

Simuleta teknoloji i kam insait nau long sapatim trening bilong ol woka long prodaksen operesen. Wanpela eksampel, Projek i putim tupela operesen trening simuleta i save kamapim ol samting i wankain tru olsem wanem samting i kamap long LNG Plent na HGCP kontrol rum. Ol i yusim ol dispela simuleta bai skruim save bilong ol woka long was na kontrolim ges prodaksen long sentral lokesen. Ol prodaksen manesa i yusim ol simuleta long strongim save bilong ol lain i kisim trening long Operesens na Mentenens na ol i ken save olsem wanem ol fil sistem i wok, long hap bilong proses na yutilitis eria.

Long LNG Plent sait, i gat narapela simuleta tu i stap long skulim ol eksperiens pilot bilong sip long wok bilong terminal operesen long LNG jeti.

Long Ogas, i bin gat wanpela de bilong luksave long sefti wok bilong LNG Plent sait na bikpela wok bilong kemp sevis em Laba Alliance Group i save mekim we ol i givim kakai moa long 30 milien kaikai long ol woka na wok bilong kamapim gutpela kemp long kwaliti wok bilong lukautim haus na mentenens. Laba Alliance Group em wanpela Lenona Kampani (Lanco) i wok wantaim Projek.

Ol Papua Niugini wanwok i bin 'kisim na lukautim' ol wokmanmeri bilong narapela kantri long dispela kwata long taim bilong amamasim Independens De bilong kantri.

Long taim ol ples bilong wok i pas, Projek wantaim ol kontrakta bilong en i sapatim ol woka long painim nupela wok long arapela hap. Wanpela eksampel, em trensisen trening progrem i kamap long LNG Plent sait. Dispela foapela de progrem i bin stat long Jun 2013 long givim save long ol Papua Niugini woka na helpim ol long painim na aplai long ol wok outsait long Projek. I kam inap nau, moa long 950 Papua Niugini woka i bin pinisim dispela volantri progrem.

Groim ol Papua Niugini bisnis

Enterprise Centre i bin helpim moa long 16,000 Papua Niugini bisnis manmeri i kam inap nau, long ol kain kain progrem bilong en. Na tu, Centre i givim moa long 9,000 trening de na 1,200 de long stia toktok i go long ol Papua Niugini bisnis long taim em i statim wok long 2010. Enterprise Centre i winim wanpela bikpela mak long taim em i pinisim namba 300 bisnis asesmen long dispela kwata.

Projek i go het long inves long ol Lanco, we moa long 2.26 bilien Kina (US\$940 milien) i go long ol sevis bilong ol Lanco. Long dispela mani, 173 milien Kina (US\$72 milien) em ol i spendim long dispela kwata. Wantaim ol Lanco, i bin gat ol arapela Papua Niugini bisnis husat i givim sevis bilong rentim kemp, katim gras na haia long ol ikwipmen. Long pinis bilong kwata, mak bilong mani Projek i spendim long sevis bilong ol Lanco na ol arapela sevis i kamap long mak bilong 9.71 bilien Kina (US\$4 bilien).

9.71+ bilien Kina em ol i spendim long Papua Niugini i kam inap nau

Wokbung wantaim ol stekholda na komyuniti

Nupela embasada bilong Papua Niugini i go long USA, Rupa Mulina, i bin stap long grup bilong ol foren sevis opisa bilong Dipatmen bilong Foren Afeas husat i kam lukluk raun long LNG Plent sait long dispela kwata. Dispela grup i wanpela bilong moa long 160 bikman na meri bilong gavman na ol ovasis kantri, ol nius ripota, na intenesenel dona ejensi, husat i bin stap long 15 edvokesi woksop na lukluk raun long LNG Plent sait long dispela kwata. Woksop i givim toksave long wanem ol samting i kamap long konstraksen bilong Projek, na i toktok long sefti, envairomen, sekiuriti na nesenel konten inisitiv.

Papua Niugini Gavman i wok long kamapim nupela rot bilong mekim ol wok bilong Projek i kamap hariap, tasol i bihainim ol lo bilong kantri. Wanpela eksampel, nupela rot bilong Nesenel Egrikalsa Kwarantn na Inspeksen Atoriti long spreim ol kago i kam insait long Papua Niugini, i helpim ol kontrakta long katim daun level bilong spreim gen ol samting long mak bilong 75 pesen.

Moa long 500 manmeri i stap insait long 200 fomal komyuniti engesmen i kamap long 55 komyuniti long dispela kwata. I kam inap nau, Projek yet i lukim moa long 30,000 manmeri long 1,400 fomal engesmen. Na tu, moa long 400 infomal engesmen i bin kamap long 41 komyuniti long dispela kwata. Givim gutpela toksave long sefti bilong ol lain i wokabaut long rot em bikpela wok i bin kamap long komyuniti engesmen, klostu long HGCP sait. Projek i wok long go het yet long skulim ol lokal komyuniti husat i save bihainim rot bilong ol yet i go long skul na maket long taim ol bikpela konstraksen wok i kamap long dispela eria.



Ol sefti toktok bilong paipain ROW i kamap long Kaiam

Bihainim onso paiplain, Projek i bin givim ol samting bilong wokim haus win na ples bilong miting, we long olgeta mun, i gat miting i kamap we ol komyuniti lida i save harim wari bilong ol komyuniti long sefti. Dispela miting i givim sans tu long mausman bilong Projek long givim toksave long wok i kamap long ROW na sefti bilong ol bikpela ikwipmen. Narapela hap bilong komyuniti sefti engesmen, em long holim ol woksop wantaim wimens grup na ol lokal skul i stap long rot bilong paiplain ROW. Ol i skulim ol mama na skul pikinini long wanem kain bagarap i ken kamap, sapos ol pikinini i pilai long ROW o we i gat ol bikpela masin i stap.

Long taim ol konstraksen wok i laik pinis nau, Projek i go het yet long wok bilong strongim ol Papua Niugini. Ol investmen bilong en long sapotim ol skul na ol bikpela teseri institusen, givim ples bilong trening na givim save long ol manmeri na bisnis long Papua Niugini, i lusim strongpela mak bilong kamapim ikonomi na developmen bilong kantri long ol yia i kam bihain.



PNG LNG

www.pnglng.com

Port Moresby - Project Headquarters
Esso Highlands Limited
Lawes Road, Munidubu Street
GPO Box 118
Konedobu, Port Moresby
Papua New Guinea

Email: pnglngproject@exxonmobil.com

ExxonMobil

PNG LNG i wok olsem wanpela han kampani bilong ExxonMobil insait long ko-vensa wantaim:



Santos
We have the energy.



